


•sawcuenh•

# Soengq Laex

送 礼

□ Yiz Ciz / 余 执



It

“Vek——vek——”, haetromh, bakdou ngaenzhangz couh miz sing mou hung heuh, nyex ndaej boux bae boux dauq cungj humx gvaqdaej yawj geizheih.

Bouxsai daenj buhraizva gen-donh, gwnz naj mumh ndaemndatndat he cam: “Geij duz mou hung neix yaek gai geijlai ngaenz?”

Bouxsai ga’ndiengj, daenj geu buhgek moq ndeu byaij ok gyang vunzlai daej, naeuz: “Song duz mou neix dwg dawz daej soengq vunz, mbouj gai ni!”

Daengz seiz hwnjban, ngaenzhangz hai dou lo, boux baujanh ndeu gvaqdaej naeuz: “Vei, vei, sou mbouj ndaej daej neix guh gaicawx bw, vaiq dawz gij doxgaiq sou buen gvaq gizwnq bae, youq gizneix guh gaicawx git vunz daej ngaenzhangz banhsaeh bw.”

Bouxsai ga’ndiengj naeuz: “Dou mbouj guh gaicawx ni, song duz mou neix caeuq gij mak neix dwg dawz daej soengq hawj ngaenzhangz.”

Ngaenzhangz hangzcangj dwg bouxsai ndang byom sang ndeu, aiq dwg baujanh gaenq lwnh de nyi bakdou miz gij saeh neix ba, de byaij ok bakdou ngaenzhangz, riu cam bouxsai ga’ndiengj: “Dingqnaeuz mwngz yaek soengq gij doxgaiq neix hawj ngaenzhangz?”

Bouxsai ga’ndiengj naeuz: “Dwg vei, hoeng mbouj dwg gou boux ndeu soengq, dwg gyoengq vunzmbanj guhdoi soengq, gyoengqde naeuz geij bi neix, ngaenzhangz bang dou lailai, seizneix mbanj dou ranzranz fatcaiz lo, ndaw mbanj yienghyiengh bienq ndei, mbouj rox aeu maz daej bauqdap ngaenzhangz, cieng yaek daengz lo, daihguya gietdingh soengq di neix hawj sou.”

Hangzcangj dingq daengz neix, roxnyinh gig ndeiri youh gamjdoengh. De naemj: Vunz soengq

ngaenz soengq laeuj, soengq haeux soengq ien, caengz raen vunz soengq mou lix gvaq bw!

Hangzcangj naeuz: “Bang raeuz lajmbanj gaijbienq diegyouq, bang boux gungzhoj duetgungz baenzfouq, gijneix cungj dwg hong duh dou, aen sim sou dou lingx lo, doxgaiq dou mbouj ndaej sou, mwngz dawz dauqbae ba!”

Bouxsai ga’ndiengj mbouj roxnaj hangzcangj, de naeuz: “Caeuq mwngz gangj vah mbouj suenqsoq, mwngz heuh Siujvangz caeuq Siujliuz gvaqdaej, gou roxnaj gyoengqde, gou heuh gyoengqde sou roengzdaej.”

Hangzcangj du bak riu dwk, cienq ndang byaij haeuj ndaw ngaenzhangz bae lo.

Ngeih

Bouxsai ga’ndiengj heuhguh Maj Yungzdau. Maj Yungzdau ndaej seiqcib lai bi, ndang byom noh nyangqnyat, gwnz naj san rim riznyaueuq. De seng ok dungx meh couh ga’gvez, byaij loh ndiengjingak ndiengjingak, guh mbouj ndaej hong naek, bingzseiz couh guh di hong dajsan gai aeu ngaenz daej ciengx mingh.

Maj Yungzdau dinfwngz ak, de san gij lozcuk, geicuk, ndijcuk aenaen baenzyawj youh ndeiungh, doenghbaez dawz daengz gwnz haw, cuengq roengz mbaq yaep he couh miz vunz cawx aeu seuqsat.

Dahnaenj ndaw mbanj dwg bouxngoemx ndeu, seng ok dungx meh couh mbouj rox gangj vah, bohme de raen Maj Yungzdau miz dinfwngz, gig naemj hawj Dahnaenj haq de.

Maj Yungzdau naemj: Ngaenz noix ciengx hoiq gvez, lozlez mbouj lw bakvauq. Gou ndanggoek yienghneix, aeu dahsau ndei hix mbouj ndaej, couh Dahnaenj ba.

Ndawranz song boux cungj dwg ndang gyad, guhguya youh ciengx lwg, ndawranz yied ngoenz yied gungzhoj.

Cin daengz doenghgo maj, mbwn raeuj bak va hai. Guekguya guh cinghcunj fuzbinz, ranz Maj Yungzdau ndaej dingh baenz ranzungzhoj, cwngfuj siengj banhfpap daej bangcoh de. Maj Yungzdau ndaej baihgwnz haj fanh maenz ngaenzbangfuz, de couh daengz gwnz bo bakmbanj guh ranzmou ciengx mou.

Haj fanh maenz ngaenz ngamq guh ndaej song baiz ranzmou, cawx ndaej cib duz moumeh, ngaenz couh yungh sat lo. Lij ndei, Maj Yungzdau ciengx mou bi he couh miz roek duz moumeh roengz lwg, de gai moulwg canh di ngaenz, cungjsuenq miz di souhaeuj lo.

Maj Yungzdau ndang gyad sim mbouj gyad, de naemj: Danghnaeuz moumeh seng geijlai moulwg cungj ciengx baenz mounoh cij gai, mbouj engq ndaej canh ngaenz ha?

Naemj daengz neix, de couh yawjraen baihnaj engq miz rongh, couh yawjraen swheij gaenq duetgungz baenzfouq lo, de angq raixcaix. Yaep ndeu aen naj riu de youh caemrwg roengzdaej lo. De sim hung rengz mbouj cuk, naemj guh daihsaeh ra boux bang mbouj miz.

Ngoenzneix ranz ronghcingx le, Maj Yungzdau couh ok dou naemj bae ranzmou guhhong. Doengxhaet de ok ranz le couh cigsoh bae ranzmou, haetneix de daej daengz bakmbanj couh caiq mbouj yamqdin lo.

Sam

“Lauxgo, mwngz youq neix guh maz ni?” Maj Yungzdau boux ndeu naemj saeh sibsib, sawqmwh dingqny miz vunz dongx de, de ngeuxgyaeuj bae yawj, daegsai caeuq dahmbwk ndeu cingq byaij daej coh de.

Maj Yungzdau naeuz: “Gou bungz daengz gienh saeh hoj guh he lo, seizneix gaenq dwg feiz doek gwnz din, mbouj rox baenzlawz guh ndei.”

Bouxsai vix dahmbwk haenx

naeuz: “De dwg Siujliuz, gou dwg Siujvangz, dou song boux dwg youq ngaenzhangz guhhong, ngoenzneix roengz mbanj daej, dwg yawjyawj gag boux vunzmbanj miz maz aeu dou bang, hab bang dou couh bang.”

Maj Yungzdau dingq le, angqvauvau naeuz: “Ndei lai lo, ndei lai lo. Sou dwg soengq saehndei daej hawj gou ha!”

Maj Yungzdau muengz dawz gij simsaeh de lwnh hawj Siujvangz caeuq Siujliuz dingq. De naeuz: “Ciengx mounoh, couh aeu lai yungh ngaenz, seizneix gou ngaenz mbouj gaeuq, gou couhdwg vih gienh saeh neix simnyap lo.”

Siujvangz naeuz: “Dou ngoenzneix couhdwg soengq ngaenz daej hawj mwngz, gaej you lo, bae, raeuz guhdoi bae yawj gij mou mwngz gonq.”

Geij boux doq gangj doq byaij coh ranzmou Maj Yungzdau bae. Ranzmou de faen guh sam lied, lied he, ciengx gij moumeh caengz roengz lwg, lied he ciengx gij moumeh cingq cij moulwg, lied he ciengx moulwg. Seizneix ndaw ranzmou miz hajcib geij duz moulwg, duzduz naeng hoengz noh oi, yaek baenz gai lo.

Maj Yungzdau naeuz: “Gou couh naemj daj buek moulwg neix hwnj, baez miz moulwg couh ciengx baenz mounoh cij gai, yienghneix, guh ranzmou, cawx swzliu, cawx yw, caux gij doxgaiq sawjungh, mbouj miz cib fanh bet fanh maenz ngaenz baenzlawz guh ndaej.”

Siujvangz caeuq Siujliuz caenda raen Maj Yungzdau ciengx mou, youh dingq daengz de baenzneix dajsuenq, song boux doxyaeng yaep he, Siujvangz naeuz: “Lauxgo, mwngz gaej you, ngoenzlaeng mwngz bae ngaenzhangz gwnz haw banh daigvanj ba, dou gietdingh hawj cib fanh maenz daigvanj hawj mwngz ciengx mounoh.”

Siujvangz song boux nai Maj Yungzdau geij coenz le, couh gvaq gizwnq bae lo.

Seiq

Miz vah naeuz “Ciengx mou mbouj ndaej ngaenz hix ndaej haex, ndaem faex mbouj baenz saeu hix ndaej fwz”. Ndae ngaenzhangz daigvanj bangcoh, Maj Yungzdau ciengx mou lai lo, haex mou hix lai lo, de dawz gij haex mou soengq hawj bouxndaemmak bae dwk gomak, gij bomak gaenh ranzmou de haenx, gomak youh hung youh cangq, mak giet aen sejrubrub. Maj Yungzdau ciengx mou ndae ngaenz lo, vunzmbanj ndaem mak hix ndae ngaenz lo. Vunzmbanj bouxboux hwnj ranz moq, ndaw mbanj loh bingz luengq seuq, daengx vunzmbanj gyo’mbaiq gungcanjdangj cwngecwz ndei, bouxboux naemj bauqdap miz ngangzhangz bangcoh, baenzneix couh miz gij saeh baihgong lo.